

共同經課 - 1

使徒行傳二章一節~二十一節

1 五旬節 ê 期已經到，in lóng 聚集 tī 一所在。2 忽然 tùi 天有聲，親像大風 teh 吹，充滿 in 所坐 kui 間 ê 厝。3 就有 teh 分開 ê 舌，出現 hō in 看見，親像火 ê 舌，歇 tī tàk 人 ê 頂面。4 In lóng 受聖神充滿，chiah 開嘴講別樣 ê 腔口，是照聖神所賞賜 in 講 ê。5 Hit 時有虔誠 ê 猶太人，tùi 天下 tàk 國來 ê，toà tī 耶路撒冷。6 Chit-ê 聲一下起，眾人聚集紛紛亂亂，因為 tàk 人聽見 in 照伊家己 ê 土腔來講。7 就 lóng gông-ngiáh 奇怪，講，你看，chiah-ê teh 講 ê kiám 無一概是加利利人 mah？8 怎樣咱聽 in 講照咱 tàk 人所出世 ê 土腔 ah？9 咱 chiah-ê Phàⁿ-th ê-a 人、Bí-thài 人、Í-lân 人，kap tiàm-tī Bí-só-pho-tài-bí，猶太 kap Ka-phàⁿ-to-ka，Pún-to kap 亞西亞，10 Hut-lū-ka kap Pông-hui-lī-a，埃及近 oá 古利奈 ê Lū-pí-a，chiah-ê 地方 ê 人，以及 tùi 羅馬來 ê 出外人，有 ê 是猶太人，有 ê 是入猶太教 ê 人，ll Kek-lí-tí 人、A-lat-pek 人，lóng 聽 in 用咱 ê 腔口來講上帝 ê 大事。12 就 lóng gông-ngiáh 躊躇，saⁿ-kap 講，這甚麼意思？13 亦有別人恥笑 in 講，in 是 lim 新酒 teh 醉。14 總是彼得 kap 十一個使徒 khiā-teh，大聲 kā in 講，猶太人，kap lóng 總 khiā 起 tī 耶路撒冷 ê 百姓 ah，lín tiòh 知 chit-ê，亦 tiòh 致意聽我 ê 話。15 Chiah-ê 人 m̄ 是酒醉，親像 lín 所 phah 算；因為 chit-tiáp tú-chiah 頂晡九點鐘：16 這就是託先知約珥所講 ê，講，17 上帝講，Tī 路尾 ê 時日，我 beh 用我 ê 神降落 tī 凡有肉體 ê；Lín ê 後生 lín ê cha-bó-kiáⁿ beh 做先知講話，Lín ê 少年人 beh 看見異象，Lín ê 老人 beh 得 tiòh 眠夢；18 Tī hiah-ê 日我也 beh 用我 ê 神 降落 tī 我 ê 奴僕奴婢；in 亦 beh 做先知來講。19 頂面 tī 天裡我 beh 顯出奇事，下面 tī 地裡我 beh 顯出神蹟，就是血，kap 火，kap 煙霧；20 日 beh 變做暗，月 beh 變做血，Tī 主大 koh 榮顯 ê 日，bē 到 ê 事先；21 Koh 凡若求叫主 ê 名 ê，會得 tiòh 救。

共同經課 - 2

詩篇一百零四篇二十四節~三十四節，三十五 b 節

24 耶和華 ah，你所造 ê 怎樣 hiah choē！lóng 是你用智慧造成 ê；遍地滿滿你 ê 富有。25 Hia 有海，大 koh 闊，其中有算 boē 了 ê 動物，大細 ê 活物 lóng 有。26 Tī-hia 有船 teh 行；有所創造 ê 大魚游來游去。27 Chiah-ê lóng teh thèng 候你，Thang 照時 hō in 食物。28 你 hō in，in 就拾起來；你 thí 開你 ê 手，in 得 tiòh 好物到飽。29 你掩你 ê 面，in 就掛慮；你將 in ê 氣收回，in 就死無，來歸 tī 土粉。30 你發出你 ê 神，in 就受創造；你 hō 地面換做新。31 願耶和華 ê 榮光永遠 tī-teh；願耶和華為 tiòh 伊所造 ê 來歡喜。32 伊看地，地就振動；伊摸山，山就出煙。33 我 beh 一世人 òng 耶和華吟詩；我 iáu 活 ê 時 beh òng 我 ê 上帝唱歌 o-ló。34 願伊掠我 ê 靜靜想做合意；我 beh 因為耶和華歡喜。35 我 ê 心神 ah，tiòh o-ló 耶和華；Lín tiòh o-ló 耶和華。

共同經課 - 3

哥林多前書十二章三 b 節~十三節

3 若 m̄ 是 hō 聖神感動 ê，也無人會講，耶穌是主。4 Taⁿ 恩賜有分別，但是神是 siāng 一個。5 職份有分別，但是主是 siāng 一個。6 功用有分別，但是上帝 siāng 一個，施行萬事 tī 眾人中 ê。7 但是聖神 ê 顯明是賞賜 tàk 人 beh 利益眾人。8 因為有 ê tùi 神用智慧 ê 話 hō 伊；有 ê 照 chit-ê 神用知識 ê 話 hō 伊；9 koh 有人 tī chit-ê 神用信 hō 伊；有 ê tī chit-ê 神用醫病 ê 恩賜 hō 伊；10 有 ê hō 伊能行各樣 ê 權能；有 ê hō 伊做先知；有 ê hō 伊能分別 chiah-ê 神；koh 有 ê hō 伊能講 tàk 樣 ê 音語；有 ê hō 伊能翻譯 tàk 樣 ê 音語。ll Chiah-ê lóng 是 siāng 一個神所施行 ê，照伊所 ài ê，隨樣分 hō tàk 人。12 因為親像身軀是一個，也有 choē-choē 體，koh 身軀 ê 體雖然 choē，lóng 是一個身軀；基督也是 án-ni。13 因為咱眾人，無論是猶太，á 是希利尼，做奴才 ê á 是自由 ê，lóng bat 受洗禮 tī 一個神，來屬 tī 一個身軀，也 lóng 總 bat lim 一個神。

共同經課 - 4

約翰福音七章三十七節~三十九節

37 當節期 ê 尾日，就是 siōng 大 ê 日，耶穌 khiā-teh，叫講，若有嘴乾 ê 人，tiòh 就近我來 lim。38 信我 ê 人，親像聖經所講，有活水 ê 溪，beh 對伊 ê 腹內流出。39 伊講 án-ni 是指信伊 ê 人所 beh 受 ê 聖神；hit 時 bē 有賞賜聖神；因為耶穌 bē 有得 tiòh 榮光。